

T2516/7249(3)

CHINESE - JAPANESE LIBRARY OF
HARVARD - YENCHING INSTITUTE

AT HARVARD UNIVERSITY

JAN 10 1941

Harvard College Library Imaging Services <http://imaging.harvard.edu>

CM	0	1	2	3	4	5	6	7	8	9	10	11	12	13	14	15	16	17
Lab D502	95/0/2	81/0/0	66/0/0	51/0/1	35/0/0	20/0/0	29/19/54	55/39/33	42/57/29	82/4/79	51/50/13	50/28/29						
	38/14/16	66/16/18	50/5/-22	43/-14/21	55/-9/-25	71/-32/0	62/34/60	40/9/-43	52/48/17	31/21/-21	72/-23/57	73/19/68						

通鑑全史彙編歷朝傳

各書統錄卷之五

世讀堂藏書

長洲

徐燁禧綏祉

鑒閱

吳郡

劉綦履公

纂輯

更名炳晨

休寧

程維培載翼

較訂

季漢紀

漢昭烈皇帝

帝名備字玄德涿郡人景帝子中山靖王之後少

孤貧與母以販履為業長七尺五寸垂手過膝顧

目見其耳有大志嘗與公孫瓚同師事盧植瓚在

幽州備往依焉。因以爲平原相。備少與河東關羽、涿郡張飛相友善。寢處同牀。恩若兄弟。而稠人廣坐。侍立終日。**興平**元年。徐州牧陶謙疾篤。謂其別駕糜竺曰。非劉備不能安此州也。乃率州人迎備。備遂領徐州。袁術勸呂布襲備。備歸曹操。操厚遇之。遣備邀袁術。得衆數萬人。乃與袁紹連兵。操怒。擊破之。還至紹軍。又陰欲離紹。**建安**六年。操自將擊備。備遂奔劉表。表迎以上賓禮。益其兵。備在荊州數年。訪諸葛亮於隆中。亮說以跨有荆益。保其

巖阻。撫和戎越。結好孫權。內脩政治。外觀時變。則霸業可成。**漢**室可興。備因與亮情好日密。十三年。劉表卒。或勸備攻表子琮。荊州可得。備不聽。琮降操。琮左右及荊州人多歸備者。操以江陵有軍實。恐備據之。將精騎五千。急追之。一日一夜行三百餘里。備棄妻子走。因魯肅以歸孫權。遂與權破操於赤壁。十四年。權表備領荊州牧。以妹妻之。十六年。曹操遣鍾繇向漢中。蜀州牧劉璋懼。遣法正將四千人迎備。法正勸備取益州。備疑未決。龐統力

傳統金
贊其計。備將數萬人入益州。劉璋救所在供奉。備入境如歸。前後贈遺。以巨億計。增益備兵。厚加資給。使擊張魯。備未卽討魯。厚樹恩德。以收衆心。十七年。曹操攻孫權。權呼備自救。因求璋益兵及糧。璋但許給半。備因激怒其衆。勒兵逕至關頭。并其兵。進據涪城。十八年。璋遣將拒備者皆降。備圍雒城一年。法正上牋與璋。爲陳形勢。璋不答。十九年。雒城潰。進圍成都。時城中尚有精兵三萬人。穀帛支一年。璋言父子在州二十餘年。無恩德加百姓。

使百姓攻戰。肌膏草野者。以璋故也。何心能安。遂出降。羣下莫不流涕。備入成都。領益州牧。於是董和黃權李嚴等。本璋之所任用也。吳懿等。璋之婚親也。彭萊。璋之所擯棄也。劉巴。璋之宿昔所怨恨也。備皆盡其器能。志士競勸。益州之民。以是大和。二十四年。備與操將夏侯淵戰於陽平。殺淵。遂取漢中。自稱爲漢中王。立子禪爲太子。魏黃初二年。辛丑。蜀中傳言。漢帝已遇害。漢中王發喪制服。謚曰孝愍皇帝。羣臣勸上尊號。四月。卽皇帝位於武

擔山名在成都府治北之南。大赦。改元章武。三以諸葛亮為

丞相。帝恥關羽之敗。將討孫權。羣臣諫不聽。權稱

臣降。魏二年。帝自巫峽建平。連營至夷陵界。立數

十屯。相守經七八月。吳陸遜用火攻之。帝升馬鞍

山。陳兵自繞。遜四面蹙攻。死者萬數。帝夜遁。僅得

入白帝城。水步軍資。一時略盡。癸卯二月。帝病篤。

託孤於亮。尚書令李嚴為副。帝謂亮曰。君才十倍

曹丕。必能安國。若嗣子可輔。輔之。如其不才。君可

自取。亮曰。敢不竭力。繼之以死。四月。崩於永安宮。

壽六十三歲。子禪嗣立。是為後帝。

漢後皇帝

癸卯。即於章武三年。改元建興。十五延熙。二十景

耀。五炎興。一共在位四十一年。丞相亮南征雍闓

等。破斬之。孟獲收闔餘眾。拒亮。亮生致獲。七縱七

擒。獲曰。公天威也。南人不復反矣。即以孟獲故渠

帥為官屬。建興五年。丞相亮率諸軍屯漢中。北伐

魏。六年。又伐魏。身率軍攻祁山。關中震懼。天水南

安。安定皆應亮。馬謖違亮節制。大敗。亮收謖揮淚

斬之亮上疏請自貶三等七年吳王孫權稱帝九年亮伐魏圍祁山作木牛流馬運米斜谷口十二年又大舉伐魏與魏將司馬懿相持於渭南懿堅壁不肯出亮數挑戰遺巾幘婦人服以激之懿怒僞上表請戰八月亮卒於軍中薦蔣琬自代長史楊儀整軍而旋懿追之姜維令儀反旗鳴鼓若將嚮懿者懿斂軍退百姓諺曰死諸葛走生仲達帝以蔣琬爲尚書令總統國事延熙七年魏曹爽寇漢中費禕却之二十年姜維數出兵伐魏蜀人愁

五言

苦譙周作仇國論以諷時宦官黃皓用事士大夫多附之者炎興元年魏遣鍾會鄧艾統十餘萬衆趨漢中大將軍姜維守劔閣攻之不克艾等廼自陰平鑿山開道以氊自裹推轉而下將士皆攀木懸崖魚貫而進至江油諸葛瞻戰艾於綿竹敗績及其子尚皆死之艾至成都帝出降姜維得帝赦亦降魏封帝爲安樂公至洛陽司馬昭與之宴飲爲之作故蜀歌旁人感愴而帝喜笑自若昭謂賈充曰人之無情一至於是他日昭問曰頗思蜀否

傳統錄 五
帝曰此間樂不思蜀也。郤正教之曰若後問宜泣
答曰先人墳墓遠在隴蜀乃心西悲無日不思因
閉其目會昭復問對如前昭曰何乃似郤正語耶
帝驚視曰誠如尊命左右皆笑以太始七年薨壽
六十五歲。

○按魏受漢禪中原之地奄有其八吳與蜀漢不
過各據一州耳陳壽志三國尊魏爲正統司馬
溫公仍之謂昭烈於中山靖王族屬疎遠不能
紀其世數名位故通鑑編年亦屬統於魏而孔

明北伐以入寇書獨朱子發明春秋之義推崇
蜀漢以延四百餘年赤帝之統言順名正而脅
制篡奪之曹操僅等於僭國之例焉亦書法之
最嚴而最公者也。

漢亡

○西漢自高祖乙未至平帝乙丑共二百一十一
年東漢自光武乙酉至獻帝庚子共一百九十
六年後漢自昭烈辛丑至後帝癸未共四十三
年

○自高祖至後帝凡二十五帝通共四百六十九
年中去新莽一十八年更始一年實四百五十
年

附魏

文帝 名丕 明帝 名叡 廢帝 名芳 弒帝 名髦 元帝 名初

璜更
名奐

文帝丕魏王曹操之長子也操沛國譙人相國參
之後父嵩本姓夏侯氏為中常侍曹騰養子無從
詳其本末操少機警有權數年二十舉孝廉為郎

為濟南相漢靈帝崩何進袁紹謀召董卓誅宦官
操聞而笑之卓未至而進果見殺京都大亂操至
陳留散家財合義兵將以誅卓初平元年韓馥袁
術等同時起兵眾各數萬操行威武將軍引兵西
據成臯與卓將戰不利鮑信謂操曰袁紹為盟主
因權專利將自生亂是復有一卓也抑之力不能
制且可據大河之南以待其變會擊黑山賊紹因
表操為東郡太守領兖州牧破降黃巾三十餘萬
眾是時卓敗諸將爭權天子播徙無定董承潛召

傳錄
操詣洛陽洛陽殘破董昭等勸操奉帝都許車駕
出轅轅而東操自爲大將軍封武平侯自天子西
遷朝廷日亂至是制度始立朕諸軍並起率乏糧
穀袁紹在河南仰食桑椹袁術在江淮取給蒲羸
羽林監棗祗請置屯田都尉以任峻爲典農中郎
將募民屯田許下州郡例置田官所在積穀皆滿
故操征伐無運糧之勞卒能兼并群雄者始於祗
而成於峻也二年袁術稱帝於壽春破走之術死
四年袁紹并公孫瓚兼四州之地將進兵攻許操

度紹膽薄不敢輕出先後馘斬其名將顏良文醜
紹遂衰又遣精銳燔其糧穀寶器紹軍大潰冀州
諸郡多舉城邑降者紹死三子譚尚熙相繼破滅
十三年操南征劉表表子琮降卽自江陵征劉備
與孫權將周瑜大戰於赤壁不利船艦悉爲備所
燒引軍從華容道步歸泥濘道不通悉使羸兵負
草填之騎乃得過泥中蹈籍死者甚衆十四年作
銅雀臺於鄴下令自敘功伐十六年討張魯關中
諸將馬超韓遂等叛尋討平之十八年春進兵濡

須口破孫權將公孫陽始自立爲魏公加九錫建社稷宗廟十九年弑伏皇后及皇子二人二十一年進爵魏王建天子車服出入警蹕孫權上書稱臣二十五年操薨於洛陽壽六十六初桓階勸操正位夏侯惇以爲宜先滅蜀蜀亡則吳服二方既定朕後遵舜禹之軌操從之至是追恨前言發病卒操制勝變化用兵如神挾天子令諸侯於天下爲得勢子丕代立漢帝詔授以丞相印綬篡奪旣成十月遂逼漢帝禪卽皇帝位追謚父操曰武皇

帝丁未改元黃初都於鄴徙洛陽首立九品官人之法大興兵伐吳親御龍舟至廣陵有渡江之志吳人嚴兵固守時大寒波濤洶湧丕嘆曰嗟乎固天所以限南北也乃引還在位七年子叡嗣立是爲明帝丁未改元太和六年青龍四年景初三年叡沉毅果斷好事土木青龍二年漢獻帝薨起太極殿築總章觀高十餘丈建翔鳳於其上又於芳林園中起土山列殿之北立八坊諸才人以次序處其中其秩石擬百官之數督修宮室有稽限者言猶在

口身首已分。又使人以馬易珠璣翡翠玳瑁於吳。景初二年，司馬懿擊遼東，討公孫淵，平之。在位十三年，年三十六歲。托孤於司馬懿。曹爽子芳嗣立。年甫八歲，是為廢帝。初，胤無子，養芳及秦王詢。宮省事秘，人莫知其由來者。或云任城王楷子。庚申改元正始。九年嘉平。六年司馬師繼父懿為大將軍，芳與左右謀殺師，事泄，師殺中書令李豐、太常卿夏侯玄、光祿大夫張緝，因廢其主芳為邵陵公。在位十五年，迎高貴鄉公髦立之。髦，明帝弟東海王霖

子也。是為弒帝。甲戌改元正元。二年甘露。四年司馬師卒，弟昭繼之。髦見威權日去，不勝其憤，遂率兵誅昭，兵敗為昭所弒。在位七年，年二十歲。迎立常道鄉公奐，是為元帝。庚辰改元景元。四年即甘露四年也。咸熙。二年司馬昭遣將滅蜀漢，進封晉王。咸熙乙酉，昭卒，子炎嗣。十二月，炎遂篡魏，廢奐為陳留王。卒於墉城。在位六年，年五十八歲。

魏亡

自文帝庚子至元帝乙酉凡五主共四十六年

附吳

大帝 名權 會稽王 名亮 景帝 名休 烏程侯 名皓

初獻帝時孫堅以討黃巾功拜長沙太守堅富春人也董卓亂袁術表堅行破虜將軍領豫州刺史轉戰至梁大破卓軍修復洛陽諸陵而還又為袁術擊劉表表遣黃祖逆之單馬行岷山為祖軍士所射殺堅娶錢塘吳氏生四子長策字伯符次權字仲謀策年十七即結納豪傑有復讎之志袁術以堅餘兵千餘還之連為術戰有功鬱鬱不得志願歸江東召募術知其恨而以劉繇據曲阿王朗

在會稽謂策未必能定乃許之表策為折衝校尉舒人周瑜從父為丹陽太守將兵迎策仍助以資糧策大喜渡江轉鬪所向莫當百姓聞說孫郎至皆失魂魄長吏委城竄伏及策至一無所犯民乃大悅策為人美姿容能笑語洞達聽受善於用人破劉繇入曲阿旬日之間四面雲集術表策行殄寇將軍術以名應圖識有僭逆之謀策致書諫止不納策遂與術絕東取會稽王朗亦降曹操表策為討逆將軍領會稽太守廬江 劉勳 豫章 華歆 相繼破

傳錄
服初策殺吳郡太守許貢。貢奴客潛民間，欲爲貢報仇。策性好獵，數出馳驅，所乘馬最駿，從騎不能及。卒遇貢客三人，射策中頰，創甚。呼弟權佩以印綬，謂曰：舉江東之衆，決幾於兩陣之間，與天下爭衡，卿不如我。舉賢任能，各盡其心，以保江東，我不如卿。遂卒。時策雖有數郡，而深險之地猶未盡從。流寓之士未有君臣之固，而張昭、周瑜等謂權可與共成大業，遂委心焉。曹操欲因喪伐之，張紘諫，遂表權爲討虜將軍，仍領會稽守。魯肅進勦除黃

祖進伐劉表，保據江東之策。權大悅。會劉表卒，表子琮降操，魯肅迎劉備於當陽。操遺權書曰：奉辭伐罪，劉琮束手。今治水軍八十萬，願與將軍會獵於吳。權以示臣下，莫不震駭。權聽周瑜、魯肅計，與備併力破操於赤壁。於是將士形勢自倍。**建安**十七年，作石頭城，徙治秣陵，改秣陵爲建業。十八年，曹操進軍濡須口。十九年，拔**魏**皖城。二十年，與劉備分荊州，圍**魏**合肥，大敗。與曹操相犄角者累年。二十二年，權降於操。操表權爲驃騎將軍，假節領

荆州牧封南昌侯二十四年襲殺蜀將關羽魏黃
 初元年權徙都鄂更名鄂曰武昌遣使稱臣并送
 降將于禁等還魏魏拜權為吳王加九錫魏徵吳
 侍子不至遂伐吳不克引還壬寅改元黃武七年即
 蜀漢章武二年魏黃初三年也三年魏主又大興
 兵伐吳親御龍舟時江水盛長魏主臨望嘆曰魏
 雖有武騎千羣無所用之乃旋師五年魏又來伐
 孫韶遣將高壽等率敢死之士五百人於徑路夜
 要魏主魏主大驚壽等獲副車羽蓋以還魏明帝

太和三年巳酉吳王即皇帝位大赦改元黃龍三年

嘉禾六年赤烏十三年太元一年追尊父堅為武烈皇帝

兄策為長沙桓王復遷都建業陸遜輔太子登守

武昌嘉禾三年漢獻帝薨吳主出擊魏魏主叡自

將攻却之赤烏十三年廢太子和立子亮為太子

太元元年十二月吳主權殂在帝位二十三年子

亮即位是為會稽王壬申改元建興二年五鳳二年太

平三年以諸葛恪為太傅魏師三道擊吳恪與戰於

徐塘魏人敗走恪遂有輕敵之心大發州郡兵擊

魏不克孫峻因民怨衆怒構謀於亮置酒伏兵殺之。以葦席裹尸投之石子岡。亮臨朝明察大將軍孫綝表奏多見難問。亮以琳專恣謀誅之。綝召大臣會宮門。黜亮為會稽王。尋殺之。迎立琅琊王休。休權第六子也。是為景帝。即以太平三年戊寅。改元永安。以孫綝為丞相。綝一門五侯。皆典禁兵。權傾人主。休聞綝有逆謀。陰與張布圖計。臘日百僚朝賀。詔武士縛綝。即日伏誅。永安六年。蜀漢亡。在位七年。休寢疾。口不能言。手書呼丞相濮陽興。把

臂託其子。吳人以蜀初亡。欲得長君。張布說朱太后立故太子和之子皓。太后曰。我寡婦人。安知社稷之慮。苟吳國無殞可矣。遂迎立之。是為烏程侯。

乙酉改元元興年一甘露年一寶鼎年三建衡年三鳳凰年三

天冊年一天璽年一天紀年四甘露元年年一晉司馬炎篡魏

皓淫虐日甚。每宴羣臣。無不咸令沉醉。置黃門郎十人。為司過之吏。奏其闕失。大者即加威刑。小者輒以為罪。後宮數千。猶採擇無已。又激水入宮。宮人有稍不合意者。輒流殺之。或剝人之面。或鑿人

傳秘錄
之。眼險諛貴幸。好興工役。是以上下離心。莫爲盡
力。**晉**羊祜屢陳伐**吳**之計。會疾篤。舉杜預自代。**天**
紀元年。**晉**大舉來伐。七將各出一道。凡二十餘萬
衆。所向皆克。**吳**人於江磧要害之處。並以鐵鎖橫
截之。又作鐵錐長丈餘。暗置江中。以逆拒舟艦。**晉**
王濬作大筏數十。方百餘步。縛草爲人。被甲持仗。
令善水者以筏先行。遇鐵錐。輒着筏而去。又作大
炬長十餘丈。灌以麻油。在船前。遇鎖。燃炬燒之。須
臾融液。船無所礙。**吳**都督孫歆懼曰。北來諸軍。乃

飛渡江也。於是沅湘以南。望風降附。杜預仗節稱
詔撫之。王濬自武昌順流。竟趨建業。濬兵甲滿江。
旌旗蔽天。鼓譟入於石頭。**吳**主皓面縛輿櫬。詣軍
門降。封歸命侯。卒於洛陽。在位十七年。壽四十二
歲。

吳亡

自大帝壬寅至烏程侯庚子凡四主共五十九年

○以上**後漢**與**魏****吳**同時鼎足。是爲三國。

晉紀

晉世祖武皇帝

姓司馬氏名炎河內溫縣人其祖名懿字仲達少
有奇節知漢運方微不欲屈節曹氏連辟不起操
欲收之始懼而就職初與太子游處預帷幄之議
文帝篡漢轉御史中丞魏大興師征吳命懿居守
迨明帝卽位都督荆豫二州諸軍事又督永梁二
州破孟達斬公孫淵與諸葛亮相持於渭水之南
懿在軍中有詔召之三日之間詔書五至乃乘追
鋒車晝夜兼行一宿至御前天子執懿手目齊王
曰吾忍死待君以後事相託與曹爽並受遺詔輔

少主及齊王卽位遷侍中都督中外諸軍錄尚書
事曹爽欲專權陽轉懿爲太傅以名尊之而已得
制其輕重懿稱疾不與政以計誅爽天子乃拜懿
爲丞相懿久疾不任朝請有大事親幸其第以諮
訪焉初曹操察懿有雄略聞其相狼顧欲驗之乃
召使前行令反顧面正向後而身不動又嘗夢三
馬同食一槽甚惡之因謂太子曰司馬懿非人臣
也太子素與懿善故得免懿卒命其子師輔政嘉
平六年師廢其主芳迎立高貴鄉公髦鎮東將軍

母丘儉揚州刺史文欽舉兵討師師自將征之淮南平師卒於許昌時弟昭留鎮洛陽自為大將軍劔履上殿奉魏主親征破斬諸葛誕歸於京師自為晉公加九錫進位相國晉國置官司焉甘露四年魏主見威權日去不勝其憤曰司馬昭之心路人所知也吾不能坐受廢辱今當自討之率宿衛蒼頭鼓譟而出中護軍賈充逆與髦戰太子舍人成濟抽戈刺髦殞於車下使司馬炎迎常道鄉公璜於鄴立之景元四年大舉伐蜀漢後主降昭總

百揆進爵為王二年卒長子炎嗣位乙酉魏主禪位於晉追尊宣王景王文王為皇帝都洛陽立子衷為皇太子即於魏咸熙二年改元泰始十年咸寧五年太康十年時承魏刻薄奢侈之後以恭儉寬恕行之天下又安太康元年杜預王濬等平吳四海一統遂怠於政帝素多內寵復納吳孫皓宮人數千掖庭殆將萬人時朝野皆知太子不惠帝恃皇孫通聰睿故無廢立之心衛瓘侍讌凌雲臺陽醉跪晉帝牀前欲言而止者三因以手撫床曰此座可

傳錄
惜帝悟因謬曰公真大醉耶自此無復言者在位
二十五年壽五十五歲太子衷立詔以楊駿爲太
尉輔政是爲孝惠皇帝

晉孝惠皇帝

庚戌改元永熙

年一永平

月二元康

年九永康

年一永寧

年一

太安

年二永興

年二光熙

年一

帝爲人戇駘又遭賈后凶

悍多權略每欲干預政事而苦爲太尉楊駿所抑
構駿以謀反族之并廢太后爲庶人召宣帝子汝
南王亮輔政帝弟楚王瑋殺亮后又殺瑋廢太子

適潛毒殺之宣帝第九子趙王倫起兵殺賈后遷
帝於金墉城永寧元年倫篡位改元建始齊王冏
起兵誅倫天子反正冏驕縱殊甚中外失望河間
王顥成都王穎起兵討冏使帝弟長沙王乂殺冏
穎遙執朝權於鄴太安二年顥穎舉兵反帝自將
討顥敗績穎都督張方入京大掠永興元年宣帝
弟之孫東海王越執乂送穎將張方殺之穎入京
師廢皇后羊氏及太子覃還鎮顥表穎爲皇太弟
改元建武東海王越奉帝征穎復皇后太子又改

傳錄
永安穎拒戰於蕩陰中帝頰三矢兵敗穎奉帝幸
鄴張方復入京城穎以匈奴左賢王劉淵爲助幽
州都督王浚并州東嬴公騰討穎穎奉帝還洛陽
張方專制朝廷劫帝幸關中東海王越討方廢穎
立豫章王熾爲太弟太宰顥殺方送越以求和越
遣祁弘奉帝東還復羊后執穎長史劉輿僞詔賜
死顥爲范陽王模所殺丙寅十一月帝食餅中毒
崩共在位十七年壽四十八歲太弟熾立是爲孝
懷皇帝

倫改建極穎改建武越改永安
俱係篡逆擅易故不詳紀元內

晉孝懷皇帝

漢魏以來羌胡鮮卑降者多處之塞內諸郡數因
忿恨殺害長吏咸寧中侍御史郭欽上疏欲遷之
邊地元康中太子洗馬江統作徙戎論謂戎狄亂
華宜早絕其原朝廷不能用時國政大亂兄弟相
屠夷狄乘釁而起遂召五胡之禍帝初封豫章王
冲素自守繼立爲皇太弟丁卯卽位改元永嘉東
海王越以帝親攬萬幾不悅乃去鎮許昌以琅琊
王睿爲安東將軍都督揚州鎮建業中原名士多

傳秘金
歸之。東海王薨，王衍奉喪還葬，石勒率輕騎追之，剖越棺，焚其屍。世子及宗室四十八人皆沒。帝在位六年，劉聰攻陷洛陽，執帝以歸。因大會，使帝着青衣行酒，侍中庾珉號哭，聰惡之，遂弑帝於平陽。年三十歲。凶問至長安，大臣立吳王晏之子秦王業卽位，是爲孝愍皇帝。

晉孝愍皇帝

癸酉改元建興。四年漢劉曜逼京師，雍州刺史麴允堅與公卿守長安，饑甚，米斗金二兩，人相食。太倉

有麴數十餅，屑爲粥以奉帝。至是復盡，帝遣使奉箋於曜，銜璧輿櫬出降。劉聰出獵，令帝戎服執戟爲導，後饗羣臣於光極殿，使帝行酒洗爵，反而更衣。又使帝執蓋，晉臣在坐者多失聲而泣。尚書郎辛賓抱帝慟哭，遂遇弑。年十八歲。帝承永嘉之亂，天下崩離，長安城中戶不盈百，朝廷無車馬章服，唯桑版署號而已。巨猾滔天，帝京危甚，故君臣窘迫以至戮辱。

東晉紀

傳錄
晉中宗元皇帝

帝名睿，字景文。宣帝曾孫琅琊恭王覲之子也。妃夏侯氏所生，實出自小吏牛金，冒姓司馬。故秦有以呂代羸。晉有以牛易馬之說。永嘉中，爲安東將軍，用王導計，出鎮建業。以顧榮、賀循爲參佐，周顛、刁協等爲腹心。江東皆歸命焉。愍帝立，進位丞相，都督中外諸軍事。西都不守，帝出師露次，移檄進討。丁丑，卽晉王位，改元建武。年一。戊寅，愍帝凶問至。羣臣請卽帝位，改元太興。年四。永昌。年一。偏安江左，不

能恢復中原，而大將軍王敦內叛，舉兵相向。據石頭，擅殺大臣，竟不朝天子。而還武昌，將相岳牧多出其門。帝遂憂憤成疾，崩。在位六年，壽四十七歲。太子紹卽位，是爲肅宗皇帝。

晉肅宗明皇帝

癸未，改元太寧。王敦移屯姑熟。年一。卽今太平府。自領揚州

牧，陰謀篡位，諷朝廷徵已。帝崎嶇遵養，以弱制強。率諸軍襲擊越城，大破之。敦黨悉平。時敦已死，有司乃發敦瘞，出屍焚其衣冠，跪而斬之。帝在位三

年壽二十七歲太子衍年甫五齡庾太后臨朝稱制以司徒王導與中書令庾亮尚書令卞壺參輔朝政而大事皆決於亮太子嗣統是為顯宗皇帝

晉 顯宗成皇帝

丙戌改元咸和

九年

咸康

一年

帝少而聰敏有成人之

量庾亮殺南頓王宗久之帝問白頭公何在亮對以謀反伏誅帝泣曰舅言人作賊便殺之人言舅作賊當如何亮懼亮又下詔徵蘇峻峻不應命舉兵與祖約反卞壺苦戰於青溪陣死二子^軫眈^吁亦

赴敵死峻兵入臺城亮奔潯陽侍中褚^殺奕抱帝登太極前殿司徒導等登御床衛之太常孔愉朝服守宗廟峻兵叱奕令下奕呵之曰蘇冠軍來覲至尊軍人豈得侵迫峻兵不敢上殿掠後宮盡府藏溫嶠以陶侃入討峻峻遷帝於石頭戊子九月侃部將斬峻約奔^後趙峻兵猶立峻弟逸為主明年羣臣攻破石頭并斬蘇逸事平議遷都王導曰古之帝王不以豐儉移都苟務本節用何憂凋弊議乃寢帝在位十七年崩壽二十二歲立同母弟岳

傳統是爲康皇帝。

晉康皇帝

初成帝有疾。中書令庾冰自以舅氏當朝。權侔人主。恐異世之後。戚屬將疎。乃言國有強敵。宜立長君。遂以帝爲嗣。癸卯改元**建元**。在位二年。帝崩。壽二十二歲。太子聃卽位。是爲孝宗皇帝。

晉孝宗穆皇帝

乙巳改元**永和**十二年。升平五年。時帝方二歲。褚太后臨朝。會稽王昱爲撫軍大將軍輔政。桓溫都督諸

軍事。**漢**主李勢驕淫。溫伐之。拜表卽行。直指成都。放火燒其城門。勢降。溫旣滅**漢**。威名大振。疏請經畧中原。未報。溫遂帥衆軍武昌。舉朝大懼。會稽王草書致溫。乃引兵還鎮。溫又大敗**秦**兵於藍田。登平乘樓。一望歎息曰。遂使神州陸沉。百年丘墟。王夷甫諸人。不得不任其責。遂克洛陽。謁諸陵。復置戍而還。殷浩連年北伐。師徒屢敗。溫數其罪。免爲庶人。帝在位十七年崩。壽十九歲。無嗣。迎成帝長子玉卽位。是爲哀皇帝。

晉哀皇帝

壬戌改元隆和

年一

興寧

年三

帝好方士，斷穀餌藥，以求長生。藥發，寢疾。崇德褚太后復攝政二年而帝崩。在位四年，壽二十五歲，無子，立同母弟奕嗣統。是爲帝奕。

晉帝奕

丙寅改元太和。初，桓溫有不臣之心，欲先立功河朔，以收時望，及興師伐燕，大敗於枋頭，威名頓挫，遂潛謀廢立，以長威權。狀憚帝守道，恐時議不服。

以宮闈重秘，牀第易誣，乃言帝少有痿疾，嬖人朱靈寶等參侍內寵，因得三男，諷太后宣令廢之。在位六年，降封爲海西縣公，徙居吳縣。帝乃杜塞聰明，終日酣暢，耽於女色，以保天年。人莫不憐之。卒時年四十五歲。海西公初廢，溫迎立元帝少子昱，卽位，是爲太宗皇帝。

晉太宗簡文皇帝

帝卽位，卽於太和六年辛未改元咸安。帝素有風儀，善容止，留心典籍，溫迎立之，從人望也。溫仗文

武之任威震內外帝雖處尊位常懼廢黜先是熒惑入太微即有海西之事及帝登阼熒惑又入太微帝甚惡之中書郎郗超在直帝引入謂曰命之脩短本所不計故當無復近日事耶超曰桓溫方內固社稷外恢經略非常之事臣以百口保之在位二年崩壽五十三歲第三子曜立是為烈宗皇帝

晉烈宗孝武皇帝

癸酉改元寧康

三年

太元

二年

初即位大司馬溫來

朝大陳兵衛或云將移晉室朝廷大震賴謝安王坦之等盡忠輔翊得以復安溫卒桓冲代之太元五年秦兵大舉入犯時苻堅經略四方欲遂平定東南秦臣進諫者甚眾堅皆不聽戎卒六十餘萬騎二十七萬旗鼓相望前後千里詔以謝石謝玄帥眾八萬拒之謝玄遣劉牢之帥精兵趣洛澗直前渡水斬秦將梁成秦步騎奔潰爭赴淮水於是謝石等水陸繼進堅登壽陽城望之見晉兵部陣嚴整又望見八公山草木皆以為晉兵始有懼色

秦兵逼淝水而陣。堅引兵少却。欲候晉半渡以鐵騎蹙而殺之。麾兵使却。遂退不可止。玄乘勝追擊。秦大敗。自相蹈襲而死者。蔽野塞川。死者什七八。堅中流矢走。十一年。拓跋珪大會於牛川。即代王位。是為北魏。於諸胡中享國最久。初帝躬親政事。雅有人主之量。既而溺於酒色。為長夜之飲。長星見。帝心甚惡之。於華林園舉酒祝之曰。長星勸汝一杯酒。自古豈有萬歲天子耶。時張貴人有寵。年近三十。帝戲之曰。汝以年當廢矣。貴人怒。因帝醉。潛使婢以被蒙帝面弑之。云。因魘暴死。在位二十四年。壽三十五歲。時會稽王道子爭權。竟不究其罪。長子德嗣。是為安皇帝。

晉安皇帝

丁酉改元隆安

五年

元興

三年

義熙

十四年

帝性不惠。口

不能言。即寒暑飲食不辨。即位之後。內外乖異。石

頭以南。皆為荆江所據。

殷仲堪桓玄

以西。皆為豫州所

專

庾楷

京口及江北。皆為劉牢之。及廣陵相高雅之

所制。朝政所及。唯三吳而已。妖賊孫恩作亂。八郡

皆為恩有盜賊蠡起人情危懼元興元年桓玄舉兵殺會稽王道子及其子元顯遂執朝政二年玄篡位國號楚改元永始入建康宮登御座而牀忽陷遷帝於潯陽封平固王三年下邳太守劉裕舉義兵討玄玄挾帝走江陵裕師克江陵乘輿反正玄將入蜀為人所殺裕擒慕容超降姚泓又破滅孫恩餘黨盧循威名大布初識云昌明之後有二帝昌明應孝武字也裕將為禪代之舉使中書侍郎王韶之與帝左右密謀弑帝而立琅琊王德文以應二

帝云帝在位二十二年崩壽三十七歲德文安帝母弟也裕迎立之是為恭皇帝

晉恭皇帝

已未改元元熙先是劉裕已受相國宋公九錫之命至是進爵為王出鎮壽陽庚申四月長星出竟天傳亮密承裕旨徵裕入輔具詔草請帝書之帝欣然曰桓玄之時晉氏已無天下重為劉公所延將二十載今日之事本所甘心遂書赤紙為詔遜於琅琊第宋王即位奉帝為零陵王居秣陵永初

二年裕使人踰垣弑之在位二年年三十七歲

晉亡

○西晉自世祖乙酉至愍帝丙子凡四主共五十

二年東晉自元帝丁丑至恭帝庚申凡十一主

共一百零四年自世祖乙酉至恭帝庚申止共

十五主合一百五十六年

附紀五胡

五胡者鮮卑匈奴氐羌羯五種胡人也相繼而起擾亂中原西晉惠帝甲子永興元

始年

漢

後為趙

劉淵新興匈奴人冒頓後也魏分其眾為五部以

淵父豹為左部帥淵少好學於書無不綜覽嘗歎

隋陸無武絳灌無文為侍子在洛陽王渾屢薦之

於武帝與語大悅迨惠帝時命為五部大都督成

都王穎使將兵拒王浚司馬騰淵請還說五部以

赴國難穎悅淵至左國劉宣等上大單于之號旬

日之間胡晉歸之者甚眾自以漢氏之甥乃稱漢

王永嘉元年即帝位改元元熙四年永鳳四年河瑞一年

淵子聰弱冠游京師驍勇博涉名士莫不與交進

位大單于。族子劉曜為建武將軍。淵在位九年卒。太子和立。劉聰殺和而自立。兵入洛陽。殺晉太子執懷帝。納惠后羊氏。發掘諸陵。焚燒宮廟。建興四年。劉曜復陷長安。愍帝出降。懷愍等皆遇弒。劉聰荒於酒色。立后六人。儀服如后者又八人。改元光興。一年嘉平。四年建元。一年麟嘉。二年聰在位八年卒。太子粲立。改元漢昌。一年聰后年未二十者四人。粲晨夕烝淫。軍國之事。一委於大將軍靳準。準勒兵入宮。執粲數而殺之。劉氏無男女少長。皆斬東市。發淵

聰墓。焚燒宗廟。鬼大哭。聲聞百里。準自號大將軍

漢天王。劉曜亦自立於赤壁。將軍喬泰等討準。斬

之時。晉元帝太興元年也。明年。劉曜徙都長安。更

國號趙。改元光初。十二年。劉粲改元漢昌。即光初元年內事也。石勒亦

稱趙王。始與曜貳。咸和三年。勒率步騎四萬入洛

城門。曜素嗜酒。將戰。醉墜馬。石堪執殺之。太子劉

熙奔上邽。石虎殺熙。及王公以下三千餘人。劉氏

亡。共二十九年。

後趙。魏冉閔附見

石勒字世龍上黨武鄉羯人也有膽略善騎射并州大饑東瀛公騰執諸胡於山東賣充軍實石勒亦被掠爲奴惠帝末海內大亂勒與汲桑結爲盜公師藩叛寇趙魏往從之桑走死勒降漢衆十餘萬引張賓爲謀主淵死劉聰授勒征東大將軍先是晉東海王越討勒衆二十餘萬薨於軍軍中推王衍爲主率衆東還勒輕騎追及之無一免者永嘉五年勒誘殺漢大將軍王彌聰署勒督幽并二州軍事初勒被鬻與其母相失劉琨得之遣使并

其從子石虎送還勒因以書招焉勒厚禮其使而報書以絕之張賓勸勒甲詞於王浚浚驕恣不復設備宵行渡易水執浚送襄國斬之封浚首獻捷於劉聰後劉曜篡漢改國曰趙石勒亦自稱趙王與曜歲相攻戰滅曜卽趙天王位以子弘爲大單于石虎怨曰吾身當矢石成大趙之業使黃吻婢兒爲大單于上晏駕不足復畱種矣咸和五年勒稱皇帝改元太和二年建平四年勒在帝位六年卒太子弘立改元延熙一年一夜以勒喪潛瘞山谷間乃備

儀衛。虛葬於高平原。石虎弒劉后。次年。弒石弘。自立。改元**建武**。十四年**太寧**。一年太子石邃謀反。誅。立石宣為太子。有冉氏子閔。驍勇善戰。虎養以為子。改姓石。發諸州四十餘萬人。治未央洛陽宮。置女官二十四等。取民間女三萬餘人充之。財帛山積。尤發前代陵墓。掠其金寶。又發近郡男女十六萬人。車十萬乘。築華林苑。燃燭夜作。死者數萬。秦公石韜有寵於石虎。欲立為太子。石宣謀殺石韜。待石虎臨喪。因行大事。韜死。事覺。囚石宣。殺之。鄴北窮

極慘酷。并殺其妻子九人。虎在位十五年。卒。立幼子世。張豺等以太后令。弒石斌。逐石遵。而石閔等討賊歸。遇石遵於路。說之長驅入京師。斬張豺。廢太子世。遵自立。初遵與閔約。事成。立為太子。至是仍立子石衍。閔乃殺石遵。石衍而立義陽王石鑒。改元**青龍**。二年殺胡羯二十餘萬人。又殺石鑒而自立。國號**魏**。復姓冉氏。弒石虎三十六孫。盡滅石氏。石祗據襄國。稱帝。改元**永寧**。二年**燕**王石儁與姚襄救石祗。大敗冉閔。幾獲之。而石祗竟為其將所弒。

石氏亡。[永和]六年。[燕]慕容恪擊殺冉閔。盡取[趙]地。共三十二年。

[燕]

慕容廆^有昌黎棘城鮮卑人也。其先號曰東胡。為匈

奴所敗。分保鮮卑山。因以為號。[晉]武帝時來歸。以為鮮卑都督。懷愍北去。元帝在江左。廆與劉琨歃血同盟。翼戴[晉]室。元帝以為龍驤將軍。封大單于。[太興]二年。攻破高句麗段氏宇文諸部。俘其眾。取遼東。皆少子慕容翰之功也。慕容廆雅好儒術。作

東觀。使世子皝與諸生同受業。[咸和]四年。廆卒。子皝嗣。進征東大將軍。[咸康]二年。自稱[燕]王。畏[趙]之強。仍稱藩於石虎。遣劉翔來求大將軍。[燕]王章璽。[永和]元年。有二龍見於[燕]宛。轉遊戲。名所見之山曰和龍城。始不用[晉]年號。皝卒。子儁立。以慕容恪為輔國將軍。取[趙]中山。斬[魏]主冉閔。遂取鄴。八年。十月。慕容儁稱皇帝。改元[燕]元。^四年。[元]璽。^五年。[光]壽。^三慕容恪薦慕容垂有命世之才。欲大用之。^{垂。皝少子也。}儁在位十二年卒。子暉立。年甫十一歲。改元[建]熙。

年十一時主少國疑誅夷狼籍獨恪舉止自若鎮之以靜朝廷聞僞死謂中原可圖桓溫曰慕容恪尚在憂方大耳太和元年恪卒桓溫伐燕慕容垂帥眾五萬請救於秦苻堅溫聞秦救至又糧儲罄竭遂焚舟從陸道奔還行七百里垂躡其後與伏兵夾擊之斬首三萬級太傅慕容評忌垂功名太后又惡垂謀誅垂父子垂奔秦六年秦王猛伐燕取洛陽克壺關入晉陽堅自帥精銳一萬人赴鄴執燕主暉共三十六年申胤歎曰福德在燕燕復建

不過一紀耳太史黃泓曰燕必中興其在吳王垂乎

秦

苻氏氏也西南夷種居畧陽先姓蒲以其家蒲長五丈五節如竹遠近咸稱蒲家焉因以為氏有蒲洪者仕後趙自稱三秦王又以識文有草付者王而其孫名堅者背上適有草付字改姓苻氏洪死苻健立時長安為杜洪所據健率苻雄苻菁統眾濟河三輔略定遣使獻捷并修好於桓溫永和七

年僭稱皇帝。改元皇始。五年十年桓溫帥師伐秦。健

太子苻萇中流矢死。健卒。苻生嗣立。改元壽光。二年

生性粗暴。自以眇目。諱言殘缺單隻之類。犯者必

死。常剝人面皮。使之歌舞。以為樂。羣臣得保一日。

如度一年。東海王苻堅。雄子也。素有時望。士卒莫

不憚服。一見王猛。猛字景畧有如舊識。生既殘虐無度。

堅遂殺生。以升平元年。去帝號。稱大秦天王。改元

永興。二年甘露。六年建元。二十一年以王猛為尚書左丞。秦

國大治。太和三年。桓溫伐燕。至枋頭。秦救燕。燕許

割地。不至。密謀并燕。朕憚吳王慕容垂威名。不敢

發。會垂被讒。與其子全。寶隆。農來奔。堅大喜。郊迎

以為冠軍將軍。遂長驅滅燕。燕政有不便於民者。

悉除之。東夷西域。朝貢者六十餘國。太元七年。會

羣臣於太極殿。謀伐晉。舉朝皆以為不可。太子苻

宏。及所幸張夫人亦諫。獨慕容垂姚萇勸行。遂決

意大舉。八年。堅自將騎卒百萬。水陸並進。遣朱序

說謝玄等降。朱序私言於謝玄曰。秦眾至。誠難與

敵。今乘其未至。速擊之。可破也。乃遣劉牢之直前

傳錄金
渡水。秦步騎奔潰，堅中流矢，以千餘騎赴慕容垂軍。是役也，乞伏國仁叛，據隴右。丁零翟斌叛，攻洛陽。慕容垂叛，收兵與丁零合。慕容紹農、隆楷、鳳等俱起應垂，斬秦將毛雷。石越、慕容弘起兵華陰。慕容冲起兵平陽，據阿房，稱帝。兵入長安，堅奔五將山。姚萇執堅以歸，縊之於新平佛寺。時晉孝武太元十年也。長樂公苻丕稱帝，改元太安。年一爲其臣馮該所弒。苻登聞丕卒，發哀，稱帝於安南，改元太初。年八與姚萇相持，敗奔平涼，亦竟爲姚興所殺。登

子崇奔湟中，卽位，改元延初。年一爲涼主乾歸所殺。乾歸於是盡有隴西之地。苻氏亡，前後共四十六年。

後秦

姚弋仲，南安赤亭羌人也。永嘉之亂，東徙榆眉。戎夏襁負隨之者數萬戶，相繼降於劉曜。石虎封平襄公。石氏亡，來歸晉，詔以爲車騎將軍。子襄爲平北將軍，時爲穆帝永和八年。弋仲卒，詔姚襄屯譙城。殷浩忌之，遣客行刺。客反以情告襄，浩北伐襄。

伏甲襲浩，遂濟淮。屯盱眙。升平元年，姚襄謀圖關中。秦民歸之者甚衆。鄧羗以三千騎壓其壘門，斬襄弟姚萇降秦。太元七年，苻堅伐晉，以姚萇爲龍驤將軍，督梁益諸州。謂之曰：昔朕以龍驤建業，未嘗輕以授人。卿其勉之。竇衝曰：王者無戲言。此不祥之兆也。苻堅嘿然。迨秦師大敗於淮南，慕容泓兵起，遣苻叡討之。萇爲司馬，兵敗。萇遣長史詣堅謝罪。堅怒，殺之。萇懼，走渭北，糾煽羗豪五萬餘家，自稱秦王。太元十年，秦王苻堅奔五將山。萇執歸。

幽之別室，求傳國璽。堅叱之曰：五胡次叙，無汝羗名。璽已送晉，不可得也。堅死，十一年，萇稱皇帝，改元白雀。建初十七年，萇寢疾，盡殺諸將有名者。十八年，萇卒。太子興秘不發喪，帥兵擊苻登殺之。乃卽位，改元皇初。弘始興勤於政事，明於用人。秦國頗治。興卒，子泓立，改元永和。裕所滅，實晉義熙十三年也。姚氏稱帝共三十五年。後秦亡。

西燕

苻堅之敗平陽太守慕容冲起兵河東有衆三萬
 堅遣竇衝討冲大破之冲前燕主暉之弟也冲率
 騎八千奔慕容泓軍泓衆至十餘萬遣使請歸舊
 君曰吳王垂已定關東願以武牢爲界永相鄰好
 堅大怒責暉暉叩頭流血堅久之曰此是二豎之
 罪待之如初泓於是進向長安改元燕興年一羣臣
 以泓德望後冲且持法苛峻乃殺泓以冲爲皇太
 弟初堅之滅燕冲姊爲河清公主年十四有殊色
 堅納之寵冠後宮冲年十二亦有龍陽之姿姊弟

專寵宮人莫進長安歌之曰一雌復一雄雙飛入

紫宮王猛切諫乃出冲於長安又歌曰鳳凰鳳凰

止阿房冲小字鳳凰太元十年冲果稱帝於阿房國號

西燕改元更始年二垂旣稱帝西燕主大失人和國

人殺之而立慕容顛改元建明將軍段隨弒顛而

立慕容瑤改元建平慕容永又攻殺瑤及段隨率

鮮卑男女四十餘萬去長安而東立慕容泓之子

慕容忠爲帝改元建武已復殺忠而立慕容永改

元中興年十凡一歲而四易主建明建平建武皆在更始二年即中興元

年永稱帝於長子縣名今屬山西潞州建國數載燕主慕容

垂已老范陽王慕容德曰慕容永國之枝葉宜先

除之垂曰吾雖老叩囊底智足以取之終不畱此

賊與子孫也遂發兵破永斬之時為晉孝武太元

十九年前後共十三年西燕亡

後燕

慕容霸眇之第五子也少岐嶷身長七尺四寸手

垂過膝慕容儁立惡之以其常墜馬折齒更名曰

軼尋以讖記之文乃去夫以垂名焉封吳王慕容

恪甚重垂及敗桓溫於枋頭威名大振懼禍及已

與諸子奔苻堅及堅擒慕容暉垂隨堅入鄴收集

諸子對之悲慟垂在秦所至征伐有大功堅之敗

於淮南也垂軍獨全堅以千餘騎奔垂世子寶勸

垂取堅垂曰彼以赤心投我若之何害之因從堅

至澗池言曰北都聞王師不利輕相煽動臣請奉

詔懷輯之堅遣之行會丁零翟斌叛驛書遣垂討

之令苻飛龍將千人為副垂募兵旬日得八千人

夜襲苻飛龍盡殺氏兵而鮮卑各部亦起兵來會

太元九年垂自稱燕王改元燕元二年大破秦兵圍

苻丕於鄴八月解鄴圍曰吾開長樂西歸之路以

謝秦王疇昔之恩十一年慕容垂稱皇帝改元建

興十十八年滅西燕二十一年伐魏得疾卒子慕

容寶立改元永康三年魏主珪擊燕進圍中山燕主

寶奔幽平慕容會軍慕容詳從寶不及城中立以

為主改元建始一年慕容麟殺詳而自立魏克中山

慕容麟奔范陽王德於鄴後為德所殺慕容寶之

奔龍城也燕人攻陷龍城尚書蘭汗誘而弑之子

慕容盛又謀殺蘭汗而自立改元建平一年長樂二年

久之乃為段璣所弑太后丁氏先與慕容熙通乃

立慕容熙改元光始六年建始一年熙荒淫無度卒亦

遇弑於馮跋焉晉安帝義熙三年後燕亡凡二十

五年

南燕

慕容德又名備德皝之少子也疇敗徙於長安苻

堅拜為奮威將軍堅之敗也還次滎陽說疇匡復

社稷疇不納及慕容垂稱燕王以德為車騎大將

傳續錄
軍復封范陽。居中鎮衛。參斷政事。勸垂滅慕容永。
〔晉〕隆安二年。〔魏〕克中山。德率戶四萬。車二萬七千。
乘自鄴將徙於滑臺。遇風船沒。〔魏〕軍將至。衆懼。會
是夕流澌凍合。得濟師。詰旦。〔魏〕兵至而冰泮。若有
神焉。及至滑臺。遂依〔燕〕元〔故〕事。改元年。潘聰曰。滑
臺四通八達。非帝王之居。青齊沃壤。號曰東秦。廣
固者。曹嶷之所營。山川阻峻。足以爲都。德大悅。引
師而南。兗州北鄙悉降。齊郡太守。辟閭渾不從。率
步騎擊之。渾奔。〔魏〕德遂入廣固。四年。卽皇帝位。改

元建平

年五

德卒。傳兄子慕容超。改元〔太〕上

年六

超不

恤政事。畋游是耽。〔晉〕太尉劉裕抗表伐之。遂執慕

容超。超神色自若。惟以母托劉敬宣焉。劉裕殺王

公以下三千人。戮超於建康市。凡十三年。〔南〕燕亡

○按陳繼儒曰。慕容氏自廐以來。世豪東夏。恪之

德業。邁於狐趙。垂之才器。不下管蕭。使恪不死

垂不奔。混一之業。指顧而定耳。乃垂力足以討

評。而不爲首亂。時足以取堅。而還其舊兵。威足

以困丕。而開以生路。尤人所難者。真太原所謂

命世之才也。後來亡國之主，猶自翹狀，身在鼎俎，神色不變，蓋先世有大功德，故子孫蹶而復奮，不若諸胡之維力是競，一敗塗地者。劉裕平燕之日，欲坑廣固，得韓範諫而止。嗚呼！燕何罪哉。前燕開基，取之劉石，後燕恢復，奪之苻秦。燕何罪哉。

北燕

馮跋，長樂信都人。父安，仕慕容永為將軍。跋幼家於昌黎，遂同夷俗。跋屢有瑞應，慕容熙密欲誅跋。

乃與諸弟亡命山澤。是時賦役繁數，民不堪命，跋遂結盟，從兄萬泥、弟素弗等二十餘人，使婦人御車潛入龍城，匿於北部司馬孫護之家，因而弑熙，立熙之養子夕陽公高雲，改元正始。二年事無大小，皆決於跋。高雲又為幸臣離班、桃仁所殺。羣寮請跋即位，遂以晉義熙五年稱天王，國號曰燕，改元太平。二年跋寢疾，命太子翼攝國事。跋弟弘裹甲入禁中為亂，射殺女御一人。跋驚懼而死。弘遂即天王位，改元太興。六年遣使賜翼死。跋有子百人，弘

傳統錄
皆殺之。**北魏**連歲出師伐**燕**，弘懼奔**高麗**國。共二十八年。宋**元嘉**十三年，**北燕**亡。

前凉

張軌，安定烏氏人，家世孝廉，以儒學著聞。當**晉**室多難，陰圖保據河西。惠帝**永寧**元年，出為持節護羌校尉、凉州刺史、河間、成都二王之難，軌遣兵赴京師。**光熙**元年，大城姑臧，其城本匈奴所築，地有龍形，故又名臥龍城。卽今甘肅累加封爵，皆固辭不受。懷帝陷沒，秦王業入關，軌馳檄關中，翼衛乘輿，建

興二年卒，立子寔為世子。長史張璽等表寔嗣攝父位。愍帝蒙塵，詔寔協贊琅琊，遣司馬韓璞等率步騎一萬東赴國難。是時秦雍之人死者什八九，惟凉州獨全。及愍帝凶問至，南陽王司馬保自稱**晉**王，改元**建康**，尋為劉曜逼害。寔奉表江東，勸卽大位。朕寔竟不用江東年號，猶稱**建興**。初，京兆人劉弘挾左道，客居凉州，寔左右皆事之，謀殺寔，奉弘為主。**太興**三年，帳下閻涉等懷刃而入，斬寔於內寢。寔弟茂起兵，盡誅其黨，羣臣以子駿幼冲，遂

推茂爲都督。劉曜自將來伐，戎卒二十八萬，列營百餘里。河西大震，陳珍却走之。旋遣使稱藩於曜。所獻不可勝計。曜拜茂爲涼王。大寧二年，茂卒。前世子駿立，年十八，卓越不羈，朕淫縱無度，國人化之。劉曜敗，駿乃去曜官爵。曜遣子劉胤大破駿將韓璞軍，遂失河西之地。曜亡，又遣使稱臣於石勒。仍假道於蜀，通表京師，每歲使者往來不絕。朕終稱建興，不奉正朔也。時駿已得隴西，自稱大都督將軍，假涼王，攝三州事。於姑臧城南築城，起謙光

殿，窮珍極巧。又於四面各起一殿，器物各依方色。士馬強盛，服御一如王者。永和二年卒，子重華立。

改元永樂。年八石虎遣梁州刺史麻秋等，侵寇不輟。

中堅將軍謝艾大破之。麻秋再進攻枹罕，又力戰拒却。石虎歎曰：吾以偏師定九州，今以九州之力困於枹罕，彼有人焉，未可圖也。重華自是連破趙兵，頗怠政事。永和八年，伐秦，大敗。九年卒，子靈耀纔十歲。右長史趙長尉緝等建議以爲時難未夷，宜立長君。駿之庶長子張祚遂卽王位，立宗廟，置

百官郊祀天地。用天子禮樂。改元和平。年一。追尊前
 五世皆為王。時災異屢見。日肆淫虐。張瓘宋混等
 長驅入殿中。奮槊刺祚。梟其首。宣示中外。立重華
 少子玄靚為主。年七歲。廢和平之號。復稱建興。遣
 使稱藩於秦。至穆帝升平五年。始奉升平之號。時
 張天錫專政。玄靚讓位不受。潛復弑之。宣言暴死。
 天錫駿之少子也。篡立。驕恣淫昏。不恤民務。秦王
 猛破天錫於枹罕。疆土日蹙。太元二年。秦統三州
 之衆。會兵姑臧。天錫不得已出降。其後天錫為秦

苻融征南司馬。從堅至壽陽。堅敗。乃於陣南奔。建
 康公子大豫。逃奔河西。復起兵攻姑臧。不克。為呂
 光所殺。張氏前後共七十六年。前涼亡。

○愚按張氏之為涼主也。世篤忠貞。翊戴晉室。家
 法最為近古。晉元定鼎江東。猶用建興舊號。至
 張重華。始僭改永樂。張祚嗣立。又僭改和平。祚
 誅。玄靚立。即復廢和平之號。仍稱建興。四十三
 年。至穆帝五年。始奉升平年號。及至於亡。未嘗
 復有僭號也。丘氏歷朝紀元錄。有張茂永元張

駿太元張玄靚太始張天錫太清張大豫鳳凰
之載考之晉書北魏書十六國春秋綱目通鑑
並無有也。不知此五號出於何書。以愚觀之。張
茂臨卒。執駿手泣曰。吾家世以孝友忠信著稱。
今雖天下大亂。汝奉承不可失也。彼其臨死。猶
克其臣職。不應有僭號一矣。下令曰。吾官非王
命。豈敢榮之。死之日。尚以白紵入棺。勿以朝服
殮。彼不欲以無王命之朝服入地下。而以叛正
朔之僞號反地上乎。不應有僭號二矣。張駿立。

黃龍見嘉泉。汜裒等請改元。以章休祥。駿不許。
始拒人以正。而終自蹈於逆。理所不出也。不應
有僭號三矣。以書勸成主李雄。稱臣於晉。以恭
順責已僭號之人。而以僭號處未失節之已。殆
非人情。不應有僭號四矣。僚屬勸駿稱涼王。領
秦涼二州牧。置公卿百官。如魏武故事。駿曰。此
非人臣所宜言。不應有僭號五矣。至玄靚始廢
和平之僞元。中守建興之初號。終奉升平之正
朔。其本末較狀可攷也。余故不載五號。而俟博

古者稽焉

後涼

呂光略陽氏人也。父婆樓佐命苻堅。官至太尉。光少不好讀書。唯樂鷹馬。及長喜結納賢豪。目重瞳子。左肘生肉印。王猛一見異之曰。此非凡人也。遷鷹揚將軍。連破勍敵。威名大著。時苻堅既剋平山東。士馬強盛。遂有西域之志。乃以光率鐵騎五千。步兵七萬。進討西域。**龜茲**音丘慈王不服。攻之。諸胡內外合七十餘萬人來救。光以精騎破其城。降者

三十餘國。桀黠胡王。昔所未賓者。皆不遠千里。望風歸附。光遣使獻捷於堅。進封順鄉侯。光欲留居西域。沙門鳩摩羅什勸其速歸。乃以駝二萬餘頭。負外國珍寶及奇伎異戲。殊禽怪獸而還。光至玉門。聞堅敗信。乃襲殺涼州刺史梁熙。自稱涼州牧。酒泉公。改元**太安**三年。晉孝武十四年。稱三河王。改元**麟嘉**七年。二十一年。即天王位。改元**龍飛**三年。光卒。立子紹為天王。改元**皇始**。庶兄太原公纂。常山公弘。俱有大功。紹懼為所害。以位讓之。纂弗受。不五

日纂率壯士攻紹。紹自殺。纂即天王位。改元咸寧。
三年弘自以功高地逼。恐不見容。乃以東苑之兵作
 亂。戰敗潰走。纂悉以東苑婦女賞軍。弘之妻女亦
 為士卒所辱。纂昏虐任意。不修國政。呂超乘其醉。
 刺之洞胷。乃立右將軍呂寶之子隆。改元神鼎。
四年
 後秦姚氏來伐。遣使請降。秦乃遣兵迎隆。其後隆
 與姚興子廣平公弼謀反。為興所殺。呂氏共十八
 年。晉安帝元興二年。後涼亡。

西涼

李暠。隴西成紀人也。世為西州著姓。祖弇。父昶。仕
 前涼。張軌。暠為昶遺腹子。少而好學。通涉經史。尤
 善天文。呂光龍飛二年。段業叛光。自稱涼州牧。業
 以暠為安西將軍。燉煌太守。業僭號。索嗣言於業。
 曰。李暠不可使據燉煌。恐此地非大王之有。乃命
 嗣代暠。暠發兵逆擊之。乃罪狀嗣於段業。業殺嗣。
 遣使謝暠。分三縣為涼興郡。進暠持節都督諸軍
 事。晉隆安四年。晉昌太守唐瑤叛業。移檄六郡。推
 暠為大都督。冠軍大將軍。秦涼二州牧。涼公。改元

庚子年五義熙元年。又改元建初。年十二奉表通晉遷

居酒泉。即今肅州沮渠蒙遜連歲來侵。嵩志在德撫。但

與通和立盟。弗與之較。嵩卒。左長史宋繇等。上世

子李歆。涼公號。改元嘉興。年四歆用刑過嚴。又好治

宮室。北涼侵暴不休。國勢漸蹙。將謀東伐。大臣固

諫不聽。遂為蒙遜所殺。歆弟李恂。嵩之第六子也。

向為燉煌太守。歆被害。與兄翻等奔於北山。郡人

宋承等。以恂在燉煌。有惠政。密信招恂。恂遂率千

騎復入燉煌。推為冠軍將軍。涼州刺史。改元永建。

年二蒙遜率眾來攻。引水灌城。宋承等開門出降。恂

先殺其妻子。自殺。蒙遜竟屠其城。翻子寶。後徙姑

臧。遺民稍稍歸附。亦奉表歸魏。時宋高祖永初二

年也。凡二十三年。西涼亡。

○按唐書。嵩子歆。歆子重耳。重耳子熙。熙子天賜。

天賜子虎。虎子昞。昞子淵。是為唐高祖。遡長發

之祥。則嵩之於唐。其猶周之后稷也歟。

南涼

秃髮烏孤。河西鮮卑人。其先有樹機能者。雄健多

謀略。晉泰始中，殺秦州刺史胡烈，敗涼州刺史蘇愉。又殺涼州刺史楊欣，於是盡有涼州之地。後為馬隆所敗，部民殺之以降。又三傳而至烏孤，烏孤有大志，三河王呂光署以大都統之號，諸部皆來降附。晉安帝隆安元年，自稱大都督大將軍，大單于西平王，改元太初。三年，耀兵廣武，進攻涼金城，克之。音敏涼郭磨楊軌叛，烏孤遣弟利鹿孤，偁檀率步騎相助。羌首梁饑攻西平，烏孤進擊，俘斬數萬，嶺南羌胡種落莫不歸命。烏孤乃更稱武威王，徙治樂

都。在位三年，因醉酒墜馬，馬倒傷脅而死。弟利鹿

孤嗣立，改元建和。

三年

西秦乞伏乾歸為秦所敗，遣

使乞降，利鹿孤迎之，處之晉興，待以上賓之禮。後

乾歸叛去，降秦。利鹿孤更稱河西王。三年，利鹿孤

死，遺令傳位于其弟偁檀，偁檀立，更稱涼王，改元

弘昌。

六年

畏後秦之強，又密圖姑臧，乃去年號，入貢

於秦。赫連勃勃來攻，大為所敗。秦欲乘釁取涼，攻

戰不息。偁檀雖遣使謝罪，而仍復稱涼王，改元嘉

平。

七年

南逼熾磐，北迫蒙遜，百姓騷動，人不安業。嘉

傳錄
平七年樂都城潰，僭檀歸西秦，歲終為熾磐鳩死。
時晉安帝義熙十年也。共十九年。南涼亡。

北涼

段業附見

沮渠蒙遜，本張掖臨松盧水胡人也。匈奴有左沮渠，右沮渠之官。先世遂以官為氏。祖父俱爵北地王。蒙遜繼領部曲，多策略，善權變，為諸胡所推服。梁熙、呂光皆奇而憚之。光王涼州，以聽讒殺羅仇、麴粥二太守。仇、粥，蒙遜伯父也。蒙遜以喪歸葬，會者萬餘人，遂結謀起兵，屯據金山，與從兄男成共

推建康太守段業為主，稱涼王。改元神璽。天璽

年三徙治張掖。蒙遜為業所憚，內不自安，求為西安

太守。因以計給業，致業逼殺男成。蒙遜乃泣告眾曰：男成忠於段王，無故枉殺，諸君能為報仇乎？遂相率斬業。業在位四年，羣僚共推蒙遜主涼州事。

改元永安

年十一

玄始

年十五

承玄

年三

義和

年二

與禿髮

氏、乞伏氏、李氏各相侵伐。玄始九年滅李歆，於是西域三十六國皆詣蒙遜稱臣貢獻。而宋魏兩朝皆授以爵服焉。蒙遜以晉安帝隆安五年自稱張

掖公義熙八年稱涼王。後八年而宋氏受禪。以宋

元嘉十年卒。第三子沮渠茂虔一作牧健立。改元永和

七年魏世祖自將由雲中濟河。茂虔率文武五千人

降。世祖釋其縛。待以藩臣之禮。共三十九年。北涼

亡。

西秦

乞伏國仁。鮮卑人。其先有如弗斯者。驍勇善射。諸

部推為統主。傳至國仁。事苻秦為前將軍。苻堅敗

於淮南。乞伏部叛命。堅遣乞伏國仁討之。更與之

合。眾至十萬。據隴右。自稱單于。置將相。號西秦。改

元建義四年晉太元十三年卒。弟乞伏乾歸立。改元

太初十三年更始三年乾歸為姚興所破。奔亡南涼。利

鹿孤。後復降秦。秦使之鎮苑川。以世子乞伏熾磐

監其部眾。五年。乾歸逃歸。復稱王。晉義熙八年。為

乞伏公府所弑。乞伏熾磐討公府。自立。改元永康

八年建弘九年熾磐卒。傳乞伏暮末。改元永弘四年夏主

赫連定滅之。共四十九年。西秦亡。

夏

初匈奴劉淵族子劉衛辰擁眾漠北魏主拓跋珪擊殺之衛辰有少子赫連勃勃奔薛干部薛干送於沒奕干沒奕干以女妻之乃臣於姚氏姚興一見而奇之寵遇踰於勳舊後叛據朔方自以大禹之後稱大夏天王改元龍升六年鳳翔五年昌武一年真興六年以叱于阿利領將作大匠發夷夏十萬人築城於朔方黑水之南勃勃曰朕將統壹萬方號統萬城城土錐入一寸築者皆死造兵器衣甲亦然劉裕伐秦取關中令子劉義真守之勃勃遣兵向

長安義真乃歸建康赫連勃勃稱皇帝性驕且虐視民如草芥羣臣廷視者鑿其目笑者抉其唇諫者截其舌而後斬之宋元嘉二年卒子赫連昌立改元承光三年魏人取統萬城赫連昌走上邽魏盡獲其王公婦女牛馬珍寶執昌以歸赫連定復稱帝於平陽改元勝光四年復取長安滅西秦吐谷渾執定以獻魏共二十五年宋元嘉八年夏亡已上為十六國

附蜀

後改成又改漢

李特略陽臨渭人也。世本巴西宕渠賓氏。號曰巴氏。特兄輔。弟庠。流驤。共五人。皆驍銳。有武幹。晉惠帝元康中。氏齊萬年反。頻年大饑。百姓流移就穀。相與入漢川者數萬家。既至劔閣。特箕踞太息曰。劉禪有如此之地。而面縛於人。豈非庸材耶。流民布散梁州。及三蜀界。永康元年。益州刺史趙廞叛。特等憑藉廞勢。專爲劫盜。李庠素曉軍法。廞殺之。特收兵得七千人。進攻成都。殺廞。遣牙將詣雒陽。陳廞罪。惠帝命羅尚率兵入蜀。特等甚懼。使弟流

弟驤迎於道。并獻牛酒寶物。尚悅。初朝廷符下秦雍。凡流民入漢川者。皆令所在召還。尚限流民上道。特等納賄。固請停至秋收。廣漢太守辛冉。犍爲太守李苾。以爲不可。流民旣不樂移。咸往歸特。於是相率反。推特行鎮北大將軍。承制封拜。屢敗羅尚。辛冉兵。永寧元年。入據成都。改元。建初。年一。以城中穀少。遣六郡流民分頭出城。且於諸塲就食。尚等約諸塲同時掩襲。特軍大敗。斬首。傳詣洛陽。特弟流。與特子蕩。雄。收集餘衆。保東北兩營。勢蹙。將

降李雄說誘六郡流民襲破羅尚軍遂取郫城軍聲復振流死諸將共立雄為主稱成都王改元建

興二年時**晉永興**元年也**光熙**元年即皇帝位改元

晏平五年國號**大成**雄深自挹損以李國李離兄弟

有智謀凡事必諮而後行狀國與離二人事雄彌

謹李離鎮梓潼李國鎮巴西俱為帳下將所殺去

降羅尚尚死巴西梓潼復為雄有大赦改元**玉衡**

二十四年於是梁州南陽漢嘉涪陵朱提建寧等州遠

人相繼而至時中原喪亂江東有事救援無所望

益州遂定事少役稀民多富實**晉咸和**九年雄卒

雄無嫡子有妾生子十餘人不立立兄蕩子斑為

太子斑最孝嗣位之後政事一委於漢王壽居喪

絕無所預雄子車騎將軍越以斑非雄所生意甚

不平與弟安東將軍期密謀作亂因斑夜哭弑之

於殯宮越奉期而立之改元**玉恒**三年期既成大事

輕諸舊臣慶賞刑威決於近幸數人雄業遂衰漢

王壽素貴重有威名懼不得免乃率步騎一萬餘

興晉陽之甲徑入成都殺用事李越景騫等縱兵

大掠。至姦淫雄女。及李氏諸婦。廢期為邛都縣公。尋自縊死。漢王壽者。特季弟驤之子也。於晉咸康四年。即皇帝位。改元漢興。六年更國號曰漢。別立宗廟。改特雄廟為大成廟。盡殺雄諸子納等。大閱軍士。有吞噬江南之志。羣臣力諫。乃止。壽卒。子勢嗣立。改元太和。三年嘉寧。二年晉遣征西將軍庾翼來伐。將軍李奕舉兵反。眾潰。射奕殺之。又李弘祚作亂。僭改元鳳凰。尋滅。勢耽於淫樂。不恤國事。境土減削。加之饑饉。晉遣桓溫帥師伐之。直抵成都。三戰三捷。勢夜開城門。先遣送降文於溫。尋與觀面縛。降。封為歸義侯。李氏合四十七年亡。

